

Date – 21/05/2024

Time - 18:30 Hrs

1. MBSE in vawiina Higher Secondary School Leaving Certificate result a tihchhuahah zirlai exam zawng zawng zinga zaa 78.04 an pass.
2. Chief Minister Pu Lalduhoma chuan Sawrkar tharah tunhma aia nasa leh hlawk zawka ruihhlo do an tum dawn a ti.
3. Vawiin khan rampumah firfiakte dona ni Anti-Terrorism Day hman a ni
4. Iran President thi ta Ebrahim Raisi thlak tur President thar June ni 28 ah thlan a ni dawn.

<><><>

HSSLC RESULT DECLARED

Mizoram Board of School Education chuan Higher Secondary School Leaving Certificate result a ti chhuak a. Exam zawng zawng mi 11,824 zinga 9227 an pass a, pass percentage hi zaa 78.04 a ni a, niin nikum aain 0.62 in a hniam.

Vawiina result tihchhuahah hian Arts Stream ah Linden Lalremruatpuia, Oikos Hr Sec School chuan mark 500 ah mark 471 hmuin pakhatna a ni a. Commerce Stream ah David Lalhminghlua, St.Pauls Hr Sec School in mark 500 ah 460 hmuin Pakhatna a ni a, Science Stream ah Lalramdina Ralte, St Pauls Hr Sec School chu mark 500 ah 477 hmuin pakhatna a ni bawk.

Result tihchhuah anih velah hian MBSE Chairman Pu JH Zoremthanga chuan MBSE Conference Hall ah chanchinbu mite a kawm a. Result tluang taka a chhuah theih chhan chu Hr Sec School zirtirtute inpekna vang ani a, Education Department pumpui tanrualna vang ani tih a sawi.

Kumina HSSLC result chhuakah hian compartment 52 an awm a, heng naupangte hian admission an tlai lohna turin compartment exam hi buatsaih thuai an tum thu leh HSSLC result complaint hun chu result chhuah atanga ni 7 anih thu MBSE Chairman Pu JH Zoremthanga chuan a sawi bawk.

HSSLC result chhuakah hian exam beitu 11824 an awm a, Arts Stream ah 8467, Science Stream ah 2807 leh Commerce Stream ah 549 awmin pass zatah mipa aain hmeichhia 679 in an tam zawk a ni.

HSSLC result chhuakah hian candidate zawng zawng pass vek sikul hi Arts ah 54, Science ah 2 leh Commerce ah 6 a awm a. Candidate zawng zawng fail vekna sikul hi Arts ah sikul 2, Science ah sikul 2 leh commerce ah sikul 1 a awm bawk.

Kumin atang hian NEP zulzuiin subject pakhatatah chauh exam tha duh tan a kum leh nghah ngai lovin Compartmental exam rualin an exam nghal thei tawh dawn a ni.

Arts Stream a pakhatna Linden Lalremruatpuia, chuan a tette atangin Civil Service a luh a tum thu a sawi a. Lekhazir kawngah Mahni inthunun theihna te,taimakna te leh chhungte supportna a pawimawh takzet a ti.

Science Stream a pakhatna Lalramdina Ralte Engineering zir a tum thu sawiin a, zir zawh lamah Civil Service lam kal a tum a. A zirlaiin Social Media a hman thin thu leh zirlai tibuai khawpin a khawih loh thu a sawi a ni.

Commerce Stream a pakhatna David Lalhminghlua chuan chhungte hnen atangin support na a dawn that thu leh an zirtitute support na an dawn nasat thu a sawi a. Delhi lamah College kal paha Chartered Accountant tih pah a tum a. Commerce Subject chu a tuina anih thu leh social media a khawih ve thin thu a sawi bawk a ni

<><><>

RUIHHLO DO CORE COMMITTEE

Chief Minister Pu Lalduhoma chuan Sawrkar tharah tunhma aia nasa leh hlawk zawka ruihhlo do an tum dawn a ti.

Ruihhlo do kawnga hmalak zel dan tur relin vawiin khan CM Conference Hall ah Chief Minister ho hian Ruihhlo Do Core Committee te an thukhawm a. Ruihhlo dona atana ruahmanna tha leh tangkai tur ngaihtuah ani dawn a ti a, Sum leh pai mamawh tur a tul anga ngaihtuah zel a ni ang a ti.

Thutkhawmah hian Supply tihtlem kawnga hmalakna chu Excise & Narcotics lamin kengkawh se an ti a. Ruihhlo supply titlem tura sum leh pai mamawh te, a dona lama sawrkar puitu tlawmngaipawlte hnena thuneihna pek dan tur leh an hmanraw mamawh pek dan tur te an rel a. Ruihhlo ngai te enkawlina lam chu Social Welfare lamin keng kawh se an ti bawk. An hmalak mek te leh hmachhawp an neih te tarlangin, TNT Lunglei building sakna tur hmuh a nih thu te, de-addiction centre sakna tur Ministry of Tribal Affairs lama dap mek a nih dan te, district jail pasarih thuamthatna tura hmalak mek a nih thu leh ruihhlo ngai te enkawlina lama thawhpui tur foreign lam thlenga dap a nih dan te tarlan tarlan a ni bawk.

Thutkhawmah hian Home Minister Pu K. Sapdanga, Social Welfare Minister Pi Lalrinpuii leh Excise Minister Pu Lalnghinglova Hmar te pawhin an Department kaltlanga hma an lak dan tlangpui an tarlang a ni.

<><><>

AH&VETY MINISTER

Animal Husbandry & Veterinary Dept Minister Pu C Lalsawivunga Office Chamber ah AH & Vety Dept ten tun hnaia ASF hrileng chungchanga hmalaknate an sawiho a.

He huna tarlan anih danin ASF hrileng vawi thumna nikum May - December chhung khan vawk 1039 thiin, 928 suat a ni a. Kumin January atanga tun thla thleng khan Champhai, Aizawl, Saitual, Khawzawl, Lunglei leh Serchhip District ah te vawk 835 thi tawhin 1086 suat a ni a. Tun dinhmunah vawk damlo te enkawlina damdawi mumal a awm loh avangin Department chuan vawk vulhtute hriat tur leh zawm tur te an chhuah thin a. Local Council leh Village Council te hriatpuiin vawk thi leh suat tur chungchangah Department hotute nen in be pawp in hmalak thin a ni.

AH& Vety Dept chuan Vawk damlo leh thi te ASF an nih leh nih loh finfiah nghal turin Department Laboratory atanga confirmed mai theih a ni lo a ti a. ASF hi scheduled Disease zinga mi a nih avangin Central guideline angin confirm tur chuan NIHSAD, Bhopal emaw NERDDL, Guwahati a thawn tur a ni, Hemi avang hian Test result chungchangah hmalak zung zung theih a ni lova Mipuite hriatthiamna an ngen bawk a ni.

Ram dang atanga frozen vawksa lakluh chungchang pawh sawiho a ni a, tun dinhmunah state pawn atanga frozen vawksa Department hriatpuiia lakluh a awm loh thu ngaihthlak a ni.

Minister chuan ASF vanga vawk vulhtu ten harsatna an tawh nasat zia hria in a tawrhpuu takzet thu a sawi. ASF hrileng dona kawngah mipui ten Department leh khawtlang hruaitute hmalakna tawiawm zel turin a ngen ani.

<><><>

CADC

Chakma Autonomous District Council (CADC)-a Executive Member atana ruat thar, Chhotapansury Constituency bialtu MDC Pu Supreme Raj Chakma chu vawiin khan Lawngtlai Additional Deputy Commissioner Pi B. Malsawmtluangin rinawmna thu tiamtirin a la lut.

Lak luh inkhawm Art & Culture Hall, Kamalanagar-a neih hi CADC-a Executive Secretary Pu Pronit Bikash Chakma chuan a kaihrui a, Chief Executive Member (CEM) & Tuichawng bialtu MLA Pu Rasik Mohan Chakma bakah, CADC-a member- te leh official pawimawhte an tel a ni.

Pu Supreme Raj Chakma hi 11th CADC Inthlanpui 2023-ah khan Indian National Congress (INC) ticket-in Chhotapansury bial atangin MDC atan thlan tlin a ni a, a hnuah MNF party a zawm a. CADC CEM-in EM atana a rawtna chu tun thla May ni 7 khan Governor chuan pawmpuiin, vawiin khan EM atan hian lak luh a ni ta a ni.

CADC-ah hian elected MDC seat 20 a awm a. Tunah hian 11th CADC-ah EM pasarih awmin, CEM hovin Executive Committee-ah member pariat an awm mek a ni.

<><><>

ANTI-TERRORISM DAY

Vawiin khan rampumah firfiakte dona ni Anti-Terrorism Day hman a ni a. Kum 1991 vawiin anga Liberation Tigers of Tamil Eelam ten Sriperumbudur-a Prime Minister hlui Rajiv Gandhi an thah ni champha a ni a. He ni hi rampumah firfiaka chetnain nghawng tha lo a neih nasat zia inhrilhthar ni atan hman thin a ni.

Prime Minister Narendra Modia chuan vawiin khan Prime Minister hlui Rajiv Gandhi hi a thihchamah hriatrengna a hlan a. Congress President Mallikarjun Kharge, Congress Parliamentary leader Sonia gandhi leh Senior Congress leader Rahul Gandhi te pawhin New Delhi-a Veer Bhumi ah Prime Minister hriatrengnan pangpar an dah a ni.

<><><>

INDIA MOURNED IRANIAN PRESIDENT DEAD

Iran President thi ta Ebrahim Raisi thlak tur President thar June ni 28 ah thlan a ni dawn. IRNA thuchhuah danin Iran interim President Mohammad Mokhber, Judiciary Chief Gholamhossein Mohseni-Ejei leh Parliament Speaker Mohammad baqer Qalibaf te thukhawm chuan inthlan hun hi an ruat a. Iran ram danah chuan President hi ni 50 chhunga thlan tur a ni a. Supreme Leader Ayatollah Ali Khamenei chuan Vice President Mohammad Mokhber chu President lailawk atan a lo ruat hrih a ni.

Puan tawh angin Iran President Dr. Sayed Ebrahim Raisi leh Foreign Minister Hossein Amir-Abdollahian te hi helicopter chesualah an thi a. India chuan vawiin khan Iran ram hrauitu thite hi sunin rampumah hnam puanzar a ngul chanvea zar tur a ni a, sawrkar hminga intihhlimna chi reng reng huaihawt a ni lo ang.

Prime Minister Narendra Modia leh External Affairs Minister Dr.S. Jaishankar te chuan Dr. Raisi leh AMir Abdollahian te chu an ui thu an sawi a. Ram hrauitu pahnihten India leh Iran inlaichinnaa an thawhhlawk zia an tarlang a ni.

Iran President Ebrahim Raisi leh Foreign Minister Hossein Amir-Abdollahian te hi Pathiannia an ramchhung hmar thlang lama helicopter chesualah an thi a. Helicopter ah hian President leh Foreign Minister bakah hian sawrkar mi pawimawh dangte pawh an chuang a ni. President Raisi hi an ram thenawm Azerbaijan nen an inrinaa tuikhuah hawwna hun a hman zawhah a haw lam a ni a. Chhum zing nasa leh khaw chhia avanga helicopter hi chesual nia hriat a ni.

<><><>